

Nana Comini Uri Illafue

Naga nairai Naciones Unidas railla rafuemo danomo duide. Perú iemo duide. Naga nairaimona damie jaide. Rafuena siadollena, danomo oficabidimaci. 10 de diciembre de 1948 bie rabemo ita rafuena llotimaci. Nana ie rafuena nana comini uiñollena jitaidimaci. Ie jira Perú ie gobierno bie rafuena birui cuetatate.

Nano llogafue

Biena uiño: Nana comini jiaie comini anamo iñellena, ie finua diese nagamie feiñollena, nana comini uri illena, bie rafuena lloticaí. Comena nagamie jeicia jira, bie rafuena lloticaí. Nana cominimo bie rafue daje isoi duide.

Biena uiño: Ailluena comini, diga icaiño jiaie cominimona duere sefuilla jira, nana comini jaciruiñeno iacana jira, naga comini rana iacana jira, bie rafuena lloticaí. Duere sefui raillano, nana comini nie isoide rafuena jaciruiñeno llollena, bie rafuena lloticaí. Duere sefui raillano, nana comini nie isoide rafuena jaciruiñeno llollena, bie rafuena lloticaí.

Biena uiño: Naga gobierno ie cominina canua, naimacimo bie isoide rafue illena. Gobierno diga, jobaime naimaci finoñellena, bie isoide rafue ie cominimo illena, naga gobierno ie cominina canua.

Biena uiño: Naga nairai jiaie nairai diga, nabairillana caijitailla jira, bie rafuena lloticaí.

Biena uiño: Naga Naciones Unidamo duide nairai bie rafuedo jaiacana jira, bie rafuena lloticaí. Nagamie comena jeiciga. Iima riño baifemo faiñede. Riño iima baifemo faiñede. Comini duere itinona jitaifedicaí, iadedi naimaci uri caimare illana jitaidicaí.

Biena uiño: -Danomo bie rafue llocana jaiticaí - nana Naciones Unidamo duide nairai llotimaci.

Biena uiño: Bie rafuena nana comini raise atona uiñuana jitaidicaí. Iena nana comini uiñuamona, bie rafue suicana jaite.

Danomo ofillanona bie rafuena lloticaí

Nana comini bie rafue anamo jitaídicaí. Naga nairai bie rafuena ñuana jitaídicaí. Bie rafuena naimaci cominina llofuiana jitaídicaí. Naga nairai bie rafue lloga uai finuana jitaídicaí, nana naimaci comini bie rafuena ollena. le jira bie rafuena lloticaí.

Rafue 1.

Nana cai comuillamona dama cai abido iticaí. Cai comuillamona jiaimie anamo iñedicaí. Nana daje facaiconi iticaí. Abi uiñuanona comuidicaí. Dani coninirie cai nabairilla.

Rafue 2.

Nana cominimo bie rafue duide. Naga nairaimo bie rafue duide: naga riñomo, naga iimamo, Jusiñamuina sedadimiemo, Jusiñamuina sedañedimiemo, jamai bue isoidimiemo, jamai bue isoiñedimiemo, dueredimiemo, ucuberedimiemo, riái uaina ñaitimiemo, jiaie uaina ñaitimiemo, diese itinomo bie rafue duide. Nie isoide gobierno anamo naimaci ia, bie rafue nana naimacimo duide.

Rafue 3.

Nana comini illana jitaídicaí. Jiaie comini anamo bu jacaiñenia, jiaime anamo budi naimie anamo oreñena. Nana comini jiaie cominina jaciruiñenana jitaídicaí.

Rafue 4.

Jiaie comemo maijillena jaca budi cominina ebe isoi fecañena. lena caídica.

Rafue 5.

Cominina isi cacaitañena. Duere sefuiñellena, cominina janafefitañena.

Rafue 6.

Naga gobierno railla: -Nana cai eniruemo itinodi cominidimaci. le jira daje isoi nagamiaina canoiticaí -railla.

Rafue 7.

Nana comini gobierno lloga uai anamo daje isoi itimaci. Nana cominimo gobierno lloga uai daje isoi duide. Bie rafuedo jaiñedimiemona jaca buna duere sefuiñena.

Rafue 8.

Gobierno lloga uaido jaiñedimiemona bu duere sefua, naiena raise siadollena, juez dine naimie jaillana buna rairuiñena.

Rafue 9.

Illaicominidi jamai ebena buna gaitañena. Calabozomo, cárcelmo jamai ebena buna uiñega. le nairaí motomona budi jamai ebena dotañega.

Rafue 10.

Bumo llogidua rafue ia, naie rafue duiñena juez dine naimiena uille, naie rafue raise siadollena. Bainino iene finoñena.

Rafue 11.

1. Bumo llogidua rafue ia, naie rafuena nia siadoñena, naimiena nia duere finoñena. Juez dine naie rafuena bainino siadoñena. Naimie dibeimo itinona naimiena riidollena rairuiñena.
2. Navui ie fino ca nia rairuiñega rafue facaina birui naimiena duere finoñena. Rairuica rafue bu finoia, ie fino ca facaise duere sefuillacino baifemo naimie duere sefuiñena.

Rafue 12.

Nagamie jofomo uri illa. Ie illa comini diga icirafuena finoñena. Bu naimiena uri itatañenia, naimie jitaia, ie uri itatañedimiena naimie llogidoia, iena illacomini rairuiñena. Bu naimie jeare ñaia, naimie jitaia, naimie jeare ñaitimiena naimie llogidoia, iena illacomini rairuiñena.

Rafue 13.

1. Ie nairaimo nine bu macariacania, illacomini naimiena rairuiñena. Ie nairaimo nine ie jofo illana bu jitaia, illacomini naimiena rairuiñena.
2. Jiaie nairaimo bu macariacania, illacomini naimiena rairuiñena. Abido ie nairaimo naimie biacania, illacomini naimiena rairuiñena. Illacomini naimiena caidiñena.

Rafue 14.

1. Duere sefuillamona jiaie nairaimo nainomo duere sefuiñellena bu jaiacania, illacomini naimiena rairuiñena.
2. Maraiñedicino finoñenia, naimie jaillana illacominidi rairuiñena.

Rafue 15.

1. Naga gobierno railla: -Nana cai eniruemo itinodi cai comini. Cai nairaimo duudimaci -railla.
2. Gobierno ie cominina oni dotañena, jiaie gobierno naimacina feiñoiacaiñenia. Cai nairaimo duiñedo -illacomini buna iese lloñena. Jiaie nairai imiena bu jaiacania, illacomini iena rairuiñena.

Rafue 16.

1. Ie aina illena, nie eimie riñona oiacania, iena buna rairuiñena. Nie isoide riñona ollena buna rairuiñena. Ie ini illena, nie riño eiñaiño ñimana oiacania, iena buna rairuiñena. Nie isoide ñimana ollena buna rairuiñena. Ua mei, uruiaina iaimaia comuitajana buna rairuiñena.

2. Aina ollena, inina ollena, conimana jitaillanona iite.
3. Naga iima ie ai diga ia, naga riño ie ini diga ia, ie nairai judaisiñeite, iadedi naga iima ie aiñede riño diga icabia, ie nairaidi judairite. Naimaci comini uri illena, naimaci nairaii judaisiñellena, naga gobierno ie cominina canua.

Rafue 17.

1. Eniruena bu namataacania, jofona bu namataacania, rana bu namataacania, illaicomini naimiena rairuiñena. Naga come iena namataacania, jiaie comini diga iena namataacania, illaicomini naimiena rairuiñena.
2. Bumona ie eniruena, bumona ie jofona, bumona ie rana jamai ebena bairoñena.

Rafue 18.

Bue isoide ramo ie comecina facaia, buna naimiena rairuiñena. Jusiñamuina bu sedaacania, buna naimiena rairuiñena. Nie isoidimiena bu sedaacania, buna naimiena rairuiñena. Jiaie raiuedo bu jaiacania, buna naimie rairuiñena. Jiaie cominimo naimie inuacino lluana buna rairuiñena. Ie jojomo iena lloia, jino iena lloia, naimiena buna rairuiñena.

Rafue 19.

Nie isoide ramo ie comeci facaia, naimiena buna rairuiñena. Naimie comeci facajacino muidona, naimie duere sefuiñena. Jiaie nairaimona bue isoide comecina facajacinona naimie feiñoiacania, jiaie nairaimo bue isoide comeci facajacinona naimie oretaiacania, iena illaicomini rairuiñena.

Rafue 20.

1. Jamai nie isoide rafue finollena comini ofitaia, naimacina buna rairuiñena. Nie isoide rafuemo bu duicania, iena buna rairuiñena.
2. Nie isoide rafuemo bu duiacaiñenia. lemo naimie duiñena buna rairuiñena.

Rafue 21.

1. Naimie jitaia, danomo ofillano, nagamie ie illaicomini nie isoi ie nairai sedajaciodi siadoga. Naimie atona siadoiacaiñenia, naimie facaina jiaimiedi iena siadolle. Ie illaicomini rafuena bu siadoiacania, naimiena buna rairuiñena.
2. Illaicomini bu jaiacania, iena buna rairuiñena.
3. Comini jitailla diese illaicomini nana comini sedaja. Dajerie illaicomini jaillena, comini dinena naimacina fetua. Nana comini uainino naimacina fetua. Naie illaicomini meidollirui jia lloga.

Rafue 22.

Seguro social railla rafuemo nana comini jainaiaina. Naie rafuemonia ie gobierno ucube illa diese nagamie feiñua. Naimie buena jita raillano, naimie comena jira, naimie uri illena, iese nagamie feiñua.

Rafue 23.

1. Nie isoide rana bu maiñacania, naimiena buna rairuiñena. Mare ra illanomo naimie maiña.
2. Maiñille jaca illena, gobierno canua.
3. Jiaimie iemañamona ibana feiñoia, naimie isoi bu maiña, ie mañamona ibana raise feiñua.
4. Naimie comena jira, ie comini buena jita raillano, ibana naimie raise feiñua. Raise feiñoñenia, gobierno naimiena canua.

Rafue 24.

Maijja fuilla mei, bu jafuier oiacania, naimiena buna rairuiñena: Cominina are maijitañena, iadedi naimci maijjacana dinori maijja. Fiesta raillaruiimo naimaci maijitañena, iadedi nairui facaina ibaca.

Rafue 25.

1. Ie comini buena jitai raillano, ie maijmona nagamie ibana feiñua. Ie comini raise guillena, iniroi illena, jofo raise illena, remedio ollena, ie diese ibana feiñua. Bu maijnia, bu duia, bu feciñona ia, bu uaicimana jaia, ie ucube bumo iñenia, gobierno naimiena canua.
2. Riño jocua facaise gobierno naiñaiñona canua. Gobierno naga uriaina daje isoi canua. Moorede uruena canua. Naiso moto oga urue daje isoi canua.

Rafue 26.

1. Nana uruiat escuelamo jaillana buna rairuiñena. Nano jailla años facaina ibatañena. Escuelamo nana uruiatjailla. Primaria fuillanona jinie escuelamo bu jaiacania, iena illaicomini t rairuiñena. Rabena uiñotino diese nainomo feiñoga.
2. Escuelamo naga rafuena raise finuana profesor llofuega. Naga urue comena jira, iese llofuega.
3. Nana conina nabairillana llofuega.

Rafue 27.

1. Nie isoide rafue ie nairai finoia, nagamie nainomo jaillana illaicomini rairuiñena. Naie rafue ite ie começi jaisillena jira, iena rairuiñena.
2. Nie isoide rana bu cueia, naiemona dama naimie ibana feiñuana buna rairuiñena.

Rafue 28.

Bie rabemo cuega rafue suillena buna rairuiñena. Nana comini bie isoide suille rafue illanomo jainaiaina.

Rafue 29.

1. Dani coniniri ie illanomo nagamie dajena maijja, nagamie comena jira.
2. Ie gobierno lloga uai diese nagamie ie jitaillacinona finua. Jiaie cominino ie comecina facajano iena finua. Nana comini uri illana iena finua.
3. Uri illena Naciones Unidas lloga uaina buna jeare uacaiñena.

Rafue 30.

Bie rafuedo jaiacadinona buna rairuiñena. Bie rafue uiñuamona, bie rabemo lloga rafuena buna jamaiñena.